



## Directivas davart il pajament da contribuziuns per las direcziuns da scolas

Sa basond sin l'art. 98 da la lescha davart las scolas popularas dal chantun Grischun dals 21 da mars 2012 (lescha da scola)

Relaschadas dal departament d'educaziun, cultura e protecziun da l'ambient ils 20 da mars 2013

### Art. 1

Questas directivas concretiseschan las premissas minimalas per il dretg da survegnir contribuziuns.

Object

### Art. 2

<sup>1</sup> Direcziuns da scola consistan d'ina u da pliras personas. Ina persuna sto vegnir designada sco persuna da contact cun l'uffizi per la scola populara ed il sport (uffizi).

Models da  
direcziuns da scola ed  
engaschament

<sup>2</sup> Il pensum da lavur minimal da 20 pertschiants da plazzas sto vegnir observà dad almain ina u in mainascola cun dretg da survegnir contribuziuns.

<sup>3</sup> Las cundiziuns d'engaschament da personas che adempleschan incumbensas directivas per la scola e che instrueschan il medem mument ston vegnir separadas.

### Art. 3

Las incumbensas e las obligaziuns da la direcziun da la scola ston vegnir fixadas en in carnet d'obligaziuns che vegn sutscrit da la u dal mainascola sco er d'ina commembra u d'in commember dal cussegl da scola.

Carnet d'obligaziuns

### Art. 4

La responsabladad per la direcziun operativa da la scola è chausa da la direcziun da la scola, e quai per incarica da l'instituziun ch'è responsabla per la scola. Latiers tutga la direcziun operativa en ils secturs da la pedagogia, da la pedagogia speziala, dal personal, da l'organisaziun e da l'administraziun sco er da las finanzas.

Obligaziuns e  
cumpetenzas da la  
direcziun da la scola  
a) princip

### Art. 5

La direcziun operativa en ils secturs da la pedagogia e da la pedagogia speziala cumpiglia en spezial:

b) pedagogia

- a) la responsabladad per il svilup e per la garanzia da la qualitat da la scola e da l'instrucziun;
- b) l'assistenza da projects communals per il svilup da la scola;
- c) visitas da l'instrucziun;
- d) la promoziun da la collavuraziun pedagogica da las personas d'instrucziun e da las personas spezializadas;
- e) la cunresponsabladad per decisziuns che concernan la carriera da scola;
- f) la coordinaziun en ils secturs da l'integrasiun e da las mesiras pedagogic-terapeuticas.

**Art. 6**

La direcziun operativa en il sector dal personal cumpiglia en spezial:

c) personal

- a) la direcziun da las personas d'instrucziun e da las personas spezializadas, da las pedellas e dals pedels sco er da l'ulteriur personal da scola;
- b) la planisaziun dal personal e l'organisaziun da substituziuns;
- c) la controlla che l'incumbensa professiunala vegnia ademplida da las personas d'instrucziun e da las personas spezializadas;
- d) la responsabladad per ils discurs cun las collavuraturas e cun ils collavuratur;
- e) la planisaziun e la coordinaziun da la furmaziun supplementara da las personas d'instrucziun e da las personas spezializadas;
- f) la proposta per l'elecziun resp. per la relaschada da personas d'instrucziun e da personas spezializadas;
- g) l'introducziun e l'assistenza da novas personas d'instrucziun e da novas personas spezializadas.

**Art. 7**

La direcziun operativa en il sector da l'organisaziun e da l'administraziun cumpiglia en spezial:

d) organisaziun ed administraziun

- a) l'execuziun e la surveglianza da las disposiziuns giuridicas sco er l'organisaziun da la scola (planisaziun da l'onn e program da scola, uraris e plans dals pensums, repartiziuns da las classas, organisaziun da las localitads);
- b) la collavuraziun cun l'uffizi competent;
- c) il management da crisas.

**Art. 8**

La direcziun operativa en il sector da las finanzas cumpiglia en spezial:

e) finanzas

- a) la planisaziun e la controlla dal preventiv en il rom da las disposiziuns chantunalas e communalas;
- b) la cumpetenzza da far expensas en il rom che vegn definì da l'instituziun ch'è responsabla per la scola.

**Art. 9**

<sup>1</sup> Las ed ils mainascolas che han il dretg da survegnir contribuziuns tenor l'artitgel 15 da l'ordinaziun da scola ston avair experientscha professiunala en il sector pedagogic sco er ina scolaziun supplementara reconuschida en il sector da la direcziun d'ina scola.

Qualificaziun

<sup>2</sup> Sco qualificaziun equivalenta valan cumulativamain experientschas en ina professiun pedagogica sco er experientschas da direcziun da plirs onns.

<sup>3</sup> Sche la u il mainascola n'ademplescha betg las premissas minimalas d'ina scolaziun supplementara absolvida en il sector da la direcziun da scola tenor l'artitgel 15 da l'ordinaziun da scola, vegnan pajadas contribuziuns chantunalas fin a maximalmain 12 mais suenter il cumenzament da l'engaschament sut la premissa che la u il mainascola:

- a) haja terminà cun success l'entir modul da basa da la scolaziun da mainascola il mumemt dal cumenzament da ses engaschament u haja in diplom ch'è equivalent al modul da basa;
- b) haja terminà cun success l'entira scolaziun da mainascola fin il pli tard 12 mais suenter il cumenzament da ses engaschament.

<sup>4</sup> Sche la scolaziun na vegn betg terminada entaifer il termin tenor l'alinea 2 litera b, vala la premissa minimala per contribuziuns sco betg ademplida, e quai retroactivamain a partir dal cumenzament da l'engaschament. Las contribuziuns ch'èn vegnidas pajadas a partir dal moment, ch'igl ha dà il midament da la u dal mainascola, ston vegnir restituidas al chantun.

#### **Art. 10**

<sup>1</sup> L'uffizi po manar tras occurrenzas obligatoricas, en spezial per infurmar e per declerar concepts e projects dal chantun.

Interfatschas ad  
instanzas chantunals

<sup>2</sup> L'uffizi sustegna las direcziuns da scola en dumondas pedagogicas ed organisatoricas.



## **Disposiziun dal departament**

### **Revisiun parziala da las directivas davart il pajament da contribuziuns per las direcziuns da scolas**

Sin basa da l'art. 98 da la lescha davart las scolas popularas dal chantun Grischun dals 21 da mars 2012 (lescha da scola; DG 421.000) ha il departament d'educaziun, cultura e protecziun da l'ambient relaschè ils 20 da mars 2013 las directivas davart il pajament da contribuziuns per las direcziuns da scolas.

Instituziuns responsablas per scolas che han in mainascola che adempleschan las premissas minimalas tenor l'art. 15 da l'ordinaziun tar la lescha da scola dals 25 da settember 2012 (ordinaziun da scola; DG 421.010) survegnan contribuziuns chantunalas tenor l'art. 73 da la lescha da scola. En cas d'ina desditga da la persuna che maina la scola èsi – oravant tut per instituziuns responsablas per la scola pli pitschnas e/u periferas u tut tenor la situaziun linguistica – savens difficil da chattar ina successura u in successur. En tscherts cas vegn però chattada ina persuna adattada, ma quella n'ha savens betg la scolaziun supplementara necessaria en il sector da la direcziun da scola. Per dar a las instituziuns responsablas per la scola pertutgadas dapli spazi d'agir, vegn l'art. 9 da la directiva qua avant maun adattà uschia che las instituziuns responsablas per la scola pon er engaschar persunas che sa chattan anc en la scolaziun da mainascola. Sch'il mainascola engaschè da nov che sa chatta anc en scolaziun ademplescha las premissas tenor l'art. 9 da las directivas, paja il chantun contribuziuns durant maximalmain 12 mais a partir dal cumenzament da l'engaschament. Questa nova regulaziun entra immediatamain en vigur e vala mo per novs engaschaments a partir da la data da l'entrada en vigur.

Sa basond sin l'art. 98 da la lescha da scola

### **dispona il departament d'educaziun, cultura e protecziun da l'ambient:**

1. La revisiun parziala da las directivas concernent il pajament da contribuziuns a direcziuns da scola en il chantun Grischun vegn relaschada.

2. La revisiun parziala entra immediatamain en vigur.
3. Communicaziun a: autoritads da scola e direcziuns da scola da las scolas popularas dal chantun Grischun; associaziun dals cussegls da scola dal Grischun (ACSG), signur Peter Reiser, president, Via Curtgin pign 7, 7031 Laax; federaziun da mainascolas dal Grischun (FMSGR), signur Silvio Dietrich, actuar, Strada Curtgin 13, 7130 Glion; Magistraglia Grischun (LEGR), dunna Sandra Locher Benguerel, presidenta, Fondeiweg 2, 7000 Cuir; finanzas e controlling DECA; uffizi per la scola populara ed il sport.



Martin Jäger, cusseglier guvernativ